





舟州山人四部稿卷之一百六十一

吳郡王世貞元美著

說部

宛委餘編六

每見中傳稱百六陽九而不得其說按洪景盧續筆云以曆志攷之其名有八初入元百六曰陽九次曰陰七又有陰七陽七陰五陽五陰三陽三皆謂之災歲大率經歲四千五百六十而災歲五十七以數計之每及八十歲則值其一然則陽九卽當承百六而言所謂災歲蓋不止陽九也及攷張世南游宦紀聞



所載王湜太乙肘後備檢則云四百五十六年爲一陽九二百八十八年爲一百六陽九奇數也爲陽數之窮百六偶數也爲陰數之窮與景盧所記不同而甚有理又曰后羿寒浞之亂得陽九之數七赧王衰微得陽九之數八桓靈卑弱得陽九之數九煬帝滅亡得陽九之數十周宣王父厲而子幽得百六之數十二敬王時吳越相殘海內多事得百六之數十三秦滅六國得百六之數十四東晉播遷十六國分裂得百六之數極而反於一五代亂離得百六之數三七所謂應者也舜禹至治得百六之數七周成康得

百六之數十一小甲雍已得陽九之數五而百六之數九庚乙武丁得陽九之數六不降得百六之數八盤庚小辛得百六之數十漢明章得百六之數十五唐貞觀得百六之數二此所謂不應者也余嘗以此試楚士無一知者又有元二之厄不可曉或云卽元元也訛而爲二耳又云楊孟文石門頌中遭元二西夷虐殘孔耽碑元二坎軻人民相食趙明誠云若作元元不成文理然徧攷曆數書無之愚竊謂恐卽入元百六而爲陽九次爲陰九詞人深晦陽九陰九之語爲元二耳姑記以俟知者



靈寶經陽九百六劫之大者也陽極於九故云陽九陰極於六故云百六卽陰六也小則三千三百年次則九千九百年大則九九八十一萬年爲劫終也又洞玄運會經天厄謂之陽九地虧謂之百六道跡經言陽九者天旱海涌而陸焦百六者大水海陸而陵淵按道經所載陽九百六又稍不同附記於此

宋姚宏校戰國策四百八十餘條太史公所採九十餘條其事異者止五六條其正文遺逸如司馬貞引馬犯謂周君徐廣引韓兵入西周李善引呂不韋言周三十七王歐陽詢引蘇秦謂元戎以鐵爲矢史記

正義碣石九門本有宮室以居春秋後語武陵王游大陵夢處女古瑟之類略可見者今本所無也至於張儀說惠王乃韓非初見秦厲憐王引詩乃韓嬰外傳後人不可得而質矣

梁書蕭琛爲宣城太守時有北僧南渡唯齋一葫蘆中有漢書序傳僧曰三輔舊老相傳以爲班固舊本琛固求得之其書多有異今者而紙墨亦古文字多如龍舉之例作隸作篆琛甚秘之後以餉鄱陽王範乃獻於東宮又劉之遴傳太子令之遴張纘到漑陸襄等參校異同之遴上十事云案範本永平十六年



五月二十一日郎班固上而今本無序傳稱中篇今本止稱敘傳今本敘傳載班彪事行範本云稚生彪自有傳今本紀及表志列傳不相合爲次而範本相合爲次總成三十八卷今本外戚在西域後範本外戚次帝紀下今本高五子文三王景十之王武五子宣元六王雜在諸傳秩中範本諸王悉次外戚下在陳項前今本韓彭等述云信惟餓隸布實鯨徒越亦狗盜芮隱江湖雲起龍驤化爲侯王範本云淮陰毅毅杖劍周章邦之傑子實惟彭英化爲侯王雲起龍驤範第三十七卷解音釋義以助雅詁而今本無此

卷攷今刻行之書唯今本而範本固不存也然大約亦可取正吾嘗欲去史記之褚先生與司馬貞而訂爲書及以鄱陽所上漢書卷數校刻之唯解音釋義不存似亦可攷而補也書此以俟

孟子所稱齊景公涕出而女於吳按所嫁乃闔閭長子名終纍俱早亡葬常熟北二里海隅山東南嶺葬畢化爲白龍而逝又齊女日夜思其家哭因名其門曰齊門今吾郡猶存化龍事雖恠誕第夫差不聞齊女爲夫人則終纍爲得之意是闔閭破楚後景公畏而女其子也



卑猶山爲太宰伯詒葬地後勾踐滅吳以詒不忠於所事僂之史記吳越春秋越絕書皆同然按左傳哀之二十二年越滅吳至二十四年公如越得太子適郢將妻公而多與之地季孫懼使因太宰詒而納賂焉乃止杜預註曰詒故吳臣也豈越初感伯詒內應之恩而用之後始僂之耶

壬寅暮秋余游西洞庭登毛公壇見所謂丹井石臺遺跡求所謂毛公者而不知其名尋入林屋洞訪靈威夫人之跡而不知其姓今見錢氏所寄陸廣徵吳地記毛公卽靈威夫人名萇始爲之一快旣而思之

恐未真也又有云般若臺晉穆侯何曾置按何曾封安成公謚曰孝當其卒於晉時吳尚未平也曾何得來此又永定寺梁天監三年蘇州刺史顏彥先置禪房寺宋建武二年蘇州刺史張岱置按晉初有顧彥先天監初不聞也是時吳郡屬揚州不稱蘇州又不設刺史宴聖寺梁天監三年司徒長史吳郡張融捨按融卒於齊不及梁天監也公孫接田彊古冶子死於齊何得葬海鹽東十五里又古樂府載其墓在蕩陰里甚明靈巖寺爲晉太尉陸玩捨按玩官司空贈止本官非太尉也又稱葬鷄籠山在吳縣西北按旣



稱陪陵葬當在建業支硎山支道林隱此後得道乘  
白馬升天而去按道林性愛馬故山有洗馬澗未嘗  
升天也又諸樊立至夫差沒一百七年按壽夢卒以  
襄十年二十二年而夫差沒凡八十九年記俱誤也  
秦相范雎初但知有張祿而已至須賈入而真姓名  
出陸遜初名議至爲荊州牧始名遜袁粲初名愍孫  
爲侍中始名粲 明張孚敬初名璉爲少傅以 上  
嫌名改爲孚敬姚崇初名元之又名元崇最後名崇  
三名俱拜相 明馮勝初名國勝次名宗異最後名  
勝封宋國公

史稱博陸侯不學無術廢立大事伊訓明徵乃問古  
有如此不至答變生兄弟書曰昔殷王祖甲一產二  
子曰噐曰良以卯日生噐以巳日生良以噐爲兄良  
爲弟許釐莊公一產二女曰妹曰笈楚大夫唐勤一  
產二子一男一女男曰貞夫女曰瓊華近代鄭昌時  
文長舊一生二男滕公一生二女李黎生一男一女  
竝以前生爲長此又近似該博老儒何也

王莽時勃海尹方年二十一無所師友性智開敏明  
達六藝魏都叔淳于倉奏方不學而文能讀誦論義  
引五經文文說議事厭合衆人之心帝徵方使射蜚



虫英射無不知者天下謂之聖人然則方之才技當在曼倩公明間而遺言行跡不甚著定是蚤夭耳  
禰正平氣高一世如荀文若之類無所不詆譏僅與孔楊善曰大兒孔文舉小兒楊德祖餘子碌碌無足言者其至荊州獨見趙戩而歎曰所謂劍則干將莫邪木則椅桐梓漆人則顏冉仲弓也戩在三輔避亂之荆依劉表而名不甚著故記之伯喈重王仲宣時亦在荆土而正平不稱許不可知也

陸士龍詩故不如士衡耳至本傳所載范陽盧志於衆中問曰陸遜陸抗於君遠近機曰如君於盧毓盧瑱志默然既起雲謂機曰殊邦遐遠容不相悉何至此哉機曰我父祖名播海內寧不知耶議者以此定二陸優劣竊恐未爾武帝嘗問吾彥陸喜陸抗二人誰多也彥曰道德名望抗不及喜立功立事喜不及抗後彥爲交州餉士衡兄弟士衡將受之士龍曰彥木微賤爲先公所拔而答詔不善安可受之乃止此段事絕同乃大相反何也要之致嚴取與覺士龍爲勝

漢告反之典封列侯爲過盛韓信彭越皆呂后使人告之也而彭越舍人傳不載姓名其人亦不封告信



者樂說封慎陽侯享國五十一年至孫買之而始弃  
市國絕告英布者賁赫封期思侯享國二十九年無  
後按告彭越舍人當是帝後知是吕后使故不封而  
慎陽過享乃尔天道似未有知也

石敬倫每與王處仲入學戲見顏淵像而嘆曰若與  
同升孔堂去人何必有間王曰不知餘人云何子貢  
去卿差近石正色云士當令身名俱泰何至以蠶牖  
語人蕭敬範爲湘州好賓友酣醺終辰座客滿筵言  
談不倦嘗謂湘東王曰下官歷觀世人多有不好歡  
樂乃仰眠床上看屋梁而著書千秋萬歲誰傳此者  
豈如臨清風對朗月登山汎水肆意酣歌也二語各  
有致未可盡非

沈休文久處端揆有志台司與徐勉最善乃以書陳  
情於勉其略謂今歲開元禮年云至懸車之請事由  
恩奪又外觀傍覽尚似全人而形骸力用不相綜攝  
常須過自束持方可僂俛解衣一臥支體不復相關  
上熱下冷月增日篤取煖則煩加寒必利後差不及  
前差後劇必甚前劇百日數旬革帶常應移孔以手  
握臂率計月小半分以此推筭豈能支久若此不休  
日復一日將貽聖主不追之恨冒言表聞乞歸老之



秩若天假其年還得平健才力所堪惟恩是策勉爲言於高祖請三司之儀不許但加鼓吹而已是休文一衰病老公不知止足者也大是殺風景事而後世因瘦腰一語誤入詞調呼之爲沈郎又以爲風流之症極大可咲沈語曲盡老態故略存之

王莽初改匈奴單于爲恭奴善于改囊知牙斯名爲知後以其叛改爲降奴服于黠高句驪爲下句驪武璽改突厥默啜爲斬啜契丹酋孫萬榮爲孫萬斬閏篡之人舉動相同乃尔

生曰名死曰諱然漢時不必尔按樊毅西嶽廟碑云

弘農太守河南樊君諱毅毅時在也趙明訪錄云漢碑生而稱諱者甚衆不特此又父母亡曰考妣而漢冀州從事郭君碑云哀哀考妣追惟霄靈卜商號咷卷子失明爾雅云父爲考母爲妣郭璞旣引禮記生曰父母妻終曰考妣嬪復援諸書以爲非生死之異稱猶今謂兄爲弟妹爲娣耳筆此以俟考

揚大年談苑云千文字題勅員外散騎侍郎周興嗣次韻勅字乃梁字傳寫誤尔當時帝王命令尚未稱勅至唐顯慶中有云不經鳳閣鸞臺不得稱勅勅之名始定據此可發一咲而趙明誠乃舉後周趙文淵



華嶽河瀆碑書奉勅撰以辨之此又不必尔也按南北二史人主命令俱謂之勅北齊樂陵王百年因習書書數勅字聞之武成發怒召入殺之又齊廢帝倖臣徐龍駒住含章殿著黃綸帽被貂裘南面向按代帝畫勅此豈僻事而揚不知之所謂不經鳳閣云云者正以阻抑內降之勅云尔

東昏侯三妃梁武初以潘妃不從賜縊欲留余妃納諫以賜王茂而不能已納吳淑媛七月而生蕭綜以自疑叛北良可嘆綜事極難處人至此豈非不幸耶○王粲乃畢萬之後至惠王之子以王爲氏王翦則周

太子晉之後五侯則齊田和之後田即陳氏陳之先爲舜故新莽以姚嬀陳田王氏爲宗室而已自取王所女東萊王基爲子納太原王沉女亦此意也

吾鄉陸象孫謂投名刺既稱頓首不當復言拜故爾然周禮辨九拜之儀一稽首二頓首注稽首拜頭至地也頓首拜頭叩地也又竒拜一拜也褒拜再拜也肅拜但俯下手即今之揖也好竒者有稱肅拜不知其自處於倨而稱頓首者亦無所不可若稱竒拜褒拜亦通

野客叢書影字古用景自葛洪撰字苑始加彡爲影



戰陣之字古用陳王右軍小學章旁作車為陣隋國  
隋州古用隨揚堅以其近遁走去疋作隋疊字古作  
疊王莽以三日太盛改從三田作疊古之對字羊下  
從口漢文帝以口多非實改從土罪字自下從辛始  
皇以字形似皇字遂改從网從非古劭字從刀劉宋  
太子名劭而惡字文為召刀遂改刀為力其說頗新  
而可據然亦有不盡然者帑紙二說尤穿鑿故不復  
記

山海經曰西九十里曰夸父之山其北多有林焉名  
桃林其中多馬多馬而放牛於其野亦可笑也又春  
秋文公十三年晉侯使詹嘉守桃林之塞以備秦以  
曲沃之官守之故曰曲沃城非曲沃也然則此為放  
牛地矣

沈佺期詩有洛浦風光何所似崇山瘴癘不堪聞今  
本作青山非也佺期集有從崇山向越裳詩序云按  
九真圖崇山距越裳四十里杉谷古崇山竹谿從道  
明國來於崇山北二十五里合水歌缺藤竹明昧有  
三十峰夾水直上千餘仞所謂放驩堯於崇山者蓋  
此地也一統志云崇山在慈利縣西三十里即放驩  
堯之所



一統志黃山有劉宋謝晦廟晦刺荊州嘗過黃山顧  
瞻久之後卒柩過不肯去因葬焉民爲立廟宋封顯  
應公本朝定祭以八月二十九日晦逆臣也本末甚  
明宋人既不之攷而洪武天順諸禮官儒臣皆似目  
無古人者可笑可笑

淮南子馬聾蟲也用脩以爲竒語按龍無耳牛耳皆  
實其聽皆以角可稱聾若馬則彼此能相語何言聾  
也

如淳漢儀註及胡毋敬俱云武帝始置太史公位在  
丞相上以司馬談爲之凡天下計出先上太史副上  
丞相此言誤也太史令六百石一云千石遷之自傳  
云天子始建漢家之封而太史公留滯東南不得與  
從事發憤且卒此豈位在丞相上者至所報任少卿  
書中所謂僕之先人非有剖符丹書之功文史星歷  
近乎卜祝之間固主上所戲弄倡優畜之流俗之所  
輕也又云僕亦嘗廁下大夫之列又可徵矣所謂計  
書先上太史副上丞相蓋上之天子而太史其守藏  
者也

陸子淵謂宋太宗平列國所謂裸將之士頗多無地  
處之於是設六館脩大部書命宋白等總之三大部



者冊府元龜太平御覽文苑英華也御覽外又別脩  
廣記五百卷按三大部即御覽廣記英華也冊府元  
龜脩於真宗朝

姑蘇志載朱勔事其一葉氏筆衡云黃策為兩浙漕  
使被旨籍勔家策故遲其往且聲言曰朱節使非他  
人比罪不過進花木耳所以遣我者亦以鄉人故也  
朱氏遂稍得為徙匿計吳中舊事則云勔敗檢其家  
資有黃發勾者素與勔不協既被旨黎明造其室家  
人婦女悉驅之出小民之家無敢容納其紀事之不  
同如此

為呂氏右袒為劉氏左袒昔人頗有以絳侯為失計  
者王應麟則曰考之儀禮鄉射疏凡事無問吉凶皆  
左袒是以士喪禮及大射皆袒左惟受刑則袒右故  
覲禮云右肉袒註云刑宜施於右是也以是攷之勃  
誅諸呂之計已定若為呂氏則有刑故以右袒令之  
耳吳興陳寔則云淖齒弑齊王王孫賈入市中呼曰  
淖齒亂齊國殺湣王欲與我誅淖齒者袒右市人從  
者四百是勃之先已有以袒右令衆者今以袒右當  
受刑則市人從討者當刑否耶應麟之考據自以為  
得情而不能不屈於陳氏矣然皆未得其情者也勃



老將也已預知衆心之歸劉氏而不能無疑於呂氏之有黨蓋令一下而或間有右袒者或遲疑未左者立誅之以令衆如楊素朱滔之舉耳豈至此而始覘人心之向背哉

唐書皮日休後仕黃巢爲學士以造讖文致忤見殺按日休後實遁於吳越以善終其子曰光業爲其國丞相見陸游集

吳越春秋楚平王謂伍奢之譽二子遣使者駕駟馬封函印綬往詐召子尚子胥令曰賀二子父奢以忠信慈仁去難就免平王內慙囚繫忠臣外愧諸侯之

耻反遇奢爲國相封二子尚爲鴻都侯胥爲蓋侯按楚雖僭稱王其令尹公子雖至貴親未有封侯者也○今人不識字者稱不識一丁唐書有挽兩石弓不如丁王楙攷謂个字之誤引續世說謂此个字及張翠微考異亦謂个字又引蜀志南史皆有所識不過十字語劉知幾謂王平所識僅通十字復以爲十字之誤恐俱未然莊子謂丁字有尾丁尾左引非右引也然則莊子亦可謂不識一丁矣又秦符堅載記太元七年饗群臣於前殿樂奏賦詩秦州別駕天水姜平子詩有丁字直而不曲堅問其故平子曰臣丁至



剛不可以屈且曲下者不正之物未足獻也堅笑曰  
名不虛得因擢爲上第豈其時謂平子擢上第而不  
識丁字耶

余以癸酉之楚江行過黃州觀有浮而編竹木筏者  
連十餘家鷄犬相望亦有豆棚瓜架之屬取陸務觀  
江行記考之當時筏猶大鋪以土可種菜今不爾也  
聞洞庭湖中大者尚可種菜楊用脩引周禮澤草所  
生種之芒種王氏農書云即江南之架田也架田一  
名葑田以木縛架爲曲田繫浮水面葑泥附木架上  
葑即菰根也根最繫而善糾結以土泥着上刈去其

蔓便可耕種江東淮南二處皆有之其田隨水上下  
東西故南方有盜田復引郭璞江賦云播匪藝之芒  
種挺自然之嘉蔬賦江而云芒種嘉蔬又曰匪藝又  
曰自然非葑田而何余按嵇含草木志薤葉如落蘇  
而小性冷而味甘南人編葦爲筏作小孔浮水中則  
如萍根浮水面及長莖葉皆出於葦筏孔中隨水上  
下實南方之奇蔬也含亦引江賦自然嘉蔬語然僅  
一種菜耳今謂爲葑田恐王氏旣誤而用脩復承之  
且璞辭明云標之以翠翳汎之以游菰鱗被菱荷攢  
布水菰翹莖瀼蓋擢穎散裏蓋菱芡石華之屬耳此



豈葑田也吳中有門曰葑廣韻注去聲菰根也吳中  
有葑田蓋水田耳若謂浮水之田可以連畛接畝未  
必有之

市巷人俚歌稱楊業之子曰楊六郎延昭延昭之子  
宗保宗保子文廣征南陷南中其事多誣罔及覽宋  
景濂所撰楊氏家傳楊端者其先太原人仕會稽爲  
望族徙寓京兆唐末南詔陷播州端應募往復之遂  
有其地傳子牧南牧南傳三公三公傳次子實實生  
昭無子時宋益州刺史楊延昭之子充廣使廣西與  
昭通譜以其子貴遷後之自是有播州者皆貴遷之

後也貴遷子光震光震子始名文廣後至粲而大迄  
今爲播州宣慰使按宋史延昭初名延朗仕至保州  
防禦使高陽關副都部署有子曰文廣從狄青南征  
爲廣西鈐轄知宜邕二州累遷定州路副都總管以  
沒今家傳所記以子貴遷後楊昭者當廣州鈐轄時  
耶家傳不言文廣而云延廣蓋以第三世復有文廣  
故諱之耳宋史又不著文廣有後與否本朝楊武襄  
洪子俊從子信能俱有威名故人以附會業延昭輩  
稱楊家將却不足論

今徐州下百二十里爲呂梁洪水勢險急漕河之喉



咽也莊子所稱呂梁在呂梁縣南泗水之上有石梁  
焉故曰呂梁也懸水三十仞流沫九十里後漸平細  
又水經注滴水出善無縣故城西南八十里其水西  
流歷于呂梁之山而爲呂梁洪其巘層岫迂澗曲涯  
深巨石崇竦壁立千仞河流激盪飈湧雲馳雷濟電  
洩震天動地司馬彪曰呂梁在離石縣西今人知徐  
之呂梁洪而不知呂縣離石之兩呂梁洪也

沈佺期詩玄菟城南秋夜長或以爲菟作平聲非也  
按袁紹典略睢固字白菟屯射犬或戒固曰將軍字  
菟而此邑名犬菟見犬其勢必驚宜急去菟不從爲

魏太祖所破誅然則菟當爲兔從兔呼廣韻於去聲  
注草名又虜複姓而不言與兔通故記之

太公望爲汲人縣民社宣白崔瑗令曰太公生於汲  
舊居猶存君與高國同宗太公今臨此國宜正其位  
以明尊祖於是立壇祀之何其迂也不虞人以崔杼  
致譏乎宋仁宗無子有一臣僚上言程嬰公孫杵臼  
共存趙宗而血食永絕所以後宮鮮胤乃詔封侯廟  
祭仍遷此僚一官前後事俱可笑

十二屬取牛鼠之類或以爲形體有缺不全如鼠無  
膽牛無下齒虎短項兔無唇龍無耳蛇無足馬無膽



羊無瞳猴無脾雞無外腎狗無腸猪無筋之類而亦有未然者陽谷漫錄云子寅辰午申戌俱陽故取相屬之奇數以爲名鼠五指龍五爪馬單蹄猴五指狗五指丑卯巳未酉亥俱陰故取相屬之偶數以爲名牛兩爪蛇雙舌羊四爪雞四爪猪四爪王充論衡則云五行之氣有賊害含血之蟲相勝服其驗何也曰寅木也其禽虎戌土也其禽犬丑亦土也丑禽牛未禽羊木勝土故犬與牛羊爲虎所服亥水也其禽豕巳火也其禽蛇子亦水也其禽鼠午亦火也其禽馬水勝火故豕食蛇火爲水所害故馬食鼠屎而腹脹此說尤似不經都元敬辨之甚悉

羯鼓錄雖存無有能傳其法者開元帝最爲妙絕宋璟裴冕李臯亦精其理宋元祐中邠州一父老能之有大合蟬滴滴泉曲其人死遂絕又有尺八者小說所載酒令遙望漁舟不隔尺八又明皇在仙宮以好吹尺八謫人間沈括云馬融笛賦空洞無底刻其上五孔一孔出其背正似今之尺八楊用脩云六孔旁一孔加竹木足黃鍾一均或謂之尺八管然則尺八亦笛類也

髮屬於心稟火氣故上生鬚屬腎稟水氣故下生眉



屬肝故側生男子腎氣外行上爲鬚下爲勢故女子黃門無勢亦無鬚

晉人喜服寒食散云服之使人神志開朗至病發則云散發反以爲貴證又喜服五石散孫思邈云五石散大猛毒寧食野葛無食五石宜急焚其方以絕萬世之禍

沈括言唐人詩多有言吳鉤吳鉤者刀名也刀彎今南唐用之謂之葛黨刀按吳越春秋闔閭既寶莫耶復令國中作鉤曰能爲善鉤者賞之百金吳作鉤者甚衆而有人貪王之重賞也殺其二子以血釁金遂

成二鉤詣宮門求賞王問其故曰吾之作鉤也貪而殺二子釁成二鉤王以舉衆鉤以示之何者是也鉤師向鉤而呼二子之名吳鴻扈稽我在於此王不知汝之神也聲絕於口兩鉤皆飛着父之胷王大驚乃賞百金遂服之此吳鉤之所由名以爲彎刀似也

陸士衡文集所爲周孝侯墓碑其自西討以前皆可據獨所謂絃盡矢絕番係不救左右勸退處按劍而怒曰此是吾按節授命之日何以退爲大臣以身殉國不亦可乎其下却云韓信背水之軍未遑得喻工輸縈帶之勢早擬連踪莫不梯山架壑襁負來歸戎



士扞其封疆農人展其耕織又云元康九年回疾增  
加奄延館舍春秋六十有二天子以大臣之葬師傅  
之禮親臨殯壤建武元年冬十一月甲子追贈平西  
將軍封清流亭侯謚曰孝禮也賜錢百萬葬地一頃  
京城地五十畝爲第詔曰處母年老加以逆旅遠人  
朕每憫念給其醫藥酒米賜以終年以太興二年歲  
在己卯正月十日葬於義興舊原娶盛氏有四子靖  
玘札碩此大可怪按本紀永熙七年處及齊萬年戰  
敗績死之詔贈官爵賜賚卹母俱與碑同但所謂回  
疾增加奄延館舍何說也且惠愍懷元俱無元康九  
年號而元帝爲晉王之歲追謚處爲孝侯今所謂建  
武元年者其明年也士衡以太安二年爲成都王穎  
所殺又十五年而爲建武元年何舛謬如此豈士衡  
先爲文成其家至建武後始立碑諱戰歿而改其辭  
又增太安以後詔令乎傳言三子玘靖札碑言四子  
最少者碩

尚書之尚本當作上音讀或云秦時人臣避上字故  
作常音至今因之不改若二十八宿音秀則洪景廬  
以爲當如本音且引說苑辨物篇曰天之五星運氣  
於五行所謂宿者日月五星之所宿也按宿之音秀



北音誤之蓋元人詞曲皆入秀字去上韻至宿州之宿則入徐字而以近徐州故別呼爲南徐州北音之謬若此

晉人如溫太真桓元子宋武帝之類皆好六博擲蒲唐名相如房玄齡姚元之之類微時亦皆爲之韓昌黎以道學文章自任尤所篤好其所著畫記云在京師甚無事同居有獨孤生申叔者與余彈碁幸勝之是也張籍與昌黎書云執事多尚駁雜無實之說使人陳之前以爲歡此有累於盛德又商論之際或不容人之短如在私尚勝者亦有所累也况爲博塞之戲與人競財乎廢棄時日不識其然願絕博塞之好棄無實之談昌黎報書止言駁雜而不及博塞蓋亦有所諱也

用脩謂首字有十四音景廬謂委蛇有十二變俱可稱引證之博矣

左傳幣錦二兩注云二丈爲一端二端爲一兩一兩一疋也然則一端不可以言一疋公羊傳乘馬束帛束帛謂玄三纁二玄三法天纁二象地然則今人以一疋帛爲束帛亦非也

墨子云楚靈王好細腰故其臣皆三飯爲節脇息然



後帶緣牆然後起韓非子云楚莊王好細腰國中皆  
餓死以理言之當是靈王也然謂宮中多餓死則近  
楚王之好細腰謂女子也其臣何故三飯

隋書許智藏傳秦王俊有疾上馳召智藏治之王夢  
其亡妃崔氏泣曰本來相迎許智藏將至當必相苦  
爲之奈何明夜俊又夢曰妾得計矣當入靈府中以  
避之及智藏至爲俊診脉曰疾已入心當即發瘡不  
可救也俊果數日而薨及考秦王俊傳俊頗好內妃  
崔氏性妬甚不平之遂於瓜中進毒由是遇疾徵還  
京師明年薨妃以毒王之故下詔廢絕賜死於家然  
則夢中故妃崔氏何人也其自相矛盾如此

魏志洛陽雖經破亂而舊三字石經宛然猶存至馮  
熙與常伯存相繼爲州廢毀分用大至頽落按漢熹  
平四年蔡邕與五官中郎將棠谿典等正定六經文  
字邕自丹於碑使工鐫刻立於太學門外後魏武定  
四年移鄴都河陽岸崩遂沒於水其得至鄴者殆不  
得半然則馮熙常伯存所損十之二三而墮水者又  
三四也周大象中詔徙鄴城石經於洛時爲軍人破  
毀至有竊載還鄴者船壞皆沒存者破作橋基隋開  
皇六年自鄴洛載入長安置於秘書內省議欲補緝



立於國學不果大業之亂多爲柱礎貞觀初魏徵始鳩集之十不一存然傳拓之本猶在趙綽云唐造防秋館穿地多得石經故洛中人士逮今有之又宋初於唐御史府掘得十一餘石黃伯思見尚書二百三十六字董道見論語第一及第十四一石二百七十字十八至二十一石三百五十七字趙明誠有千餘字謂邕所書乃八分而三體乃魏時所建不可知然前輩所記關中藩司尚有數石而余嚴訪之俱無踪跡豈其存者亦爲柱礎之類耶爲一慨而書之

今世稱三蘇曰老泉東坡穎濱石林燕語則云蘇子瞻謫黃州號東坡居士東坡其所居地也晚又號老泉山人以眉山先塋有老翁泉故云子由自嶺外歸許下號穎濱遺老亦自爲傳家有遺老齋葉夢得之言恐自有據

唐有四元崔延翰又爲制科首也宋三元則王丞相曾揚學士寘馮樞使京金孟學士宗獻元王憲僉宗哲明商少保輅若歐陽少師脩則本州及太學禮部試稱三元而廷試在第五非真三元也

弇州山人四部稿卷之一百六十一



弇州山人四部稿卷之一百六十二

吳郡王世貞元美著

說部

宛委餘編七

偶一時人賦詩有陸通姓名人不曉所謂余謂此楚狂接輿也見莊子疏然詩入接輿則雅入陸通則俗此不可不知也按何氏餘冬序錄考姓名頗詳然亦有未備者因增記於此倉頡姓侯剛氏見古篆文註許由字武仲見莊子釋文堯姓伊祁少昊名摯字青陽帝嚳名彥成湯字高密見帝王世紀臯陶字庭堅



孤竹君姓墨名台見孔叢子註伯夷名允一名元字  
公信叔齊名智字公達見論語疏中子名伯遼見周  
曇詠史詩當作仲遼見帝王世紀彭祖姓錢錢音名鏗  
見論語疏其子名胥餘見莊子司馬彪註老子父名  
乾字元杲見前涼錄老子初生時名玄祿見玄妙內  
篇管叔名度見史記註易牙名亞見孔穎達疏逢蒙  
之弟名鴻趨楊朱之弟名布見列子伯樂姓孫名陽  
師曠字子野見莊子疏公孫弘字次卿見鄒長禧書  
子產一名美見左傳註杜康字仲寧見魏武短歌行  
註孟軻字子輿見漢書并孔叢子又字子居見聖證  
論莊周字休見列子註孫叔敖名饒見孫叔碑計然  
一名研一名倪又姓辛字子文見史記索隱文種字  
子禽見吳越春秋陳仲子字子終見皇甫謐高士傳  
漢高祖父太公名崐見後漢書註又名焜字執嘉見  
皇甫謐帝皇世紀昭靈后名含高祖兄仲名喜曹參  
字敬伯申公名培見史記註項伯名纏字伯見漢書  
註叔孫通名何見楚漢春秋東園公姓轅名秉字宣  
明夏黃公姓崔名廓字少通綺里季姓朱名暉字文  
季角里先生姓周名述字元道竝高士傳壺關三老  
茂姓令狐見荀悅漢紀楊王孫名貴見西京雜記次



非亦名荆軻見續博物志伏生名勝字子賤見西漢碑文翁名黨字仲翁見張崇文歷代小誌張宗字諸君杜茂字諸公見陳忠傳記註楊子雲所稱李士元者名弘見蜀秦宓傳鄭子真名樸嚴君平名遵見王貢兩龔傳註張宗字諸公見陳忠傳註施延字君子見後漢書註田生字子春見楚漢春秋侯芭字鋪子見論衡丁公名固見楚漢春秋衛夫人名鑠字茂漪見翰墨志綠珠姓梁白州人見小傳呂安字仲悌居苗姓應瑒從弟俱見文選註花卿名驚定見舊唐書僧一行姓張名遂見續博物志竇滔字連波見武后

記失馬塞翁姓李見高谷詩序

男子有雙名者夏主赫連勃勃吐蕃將乞藏遮遮國相尚婢婢唐琵琶客羅黑黑樂工紀孩孩劍客精精兒空空兒李懷光外孫燕八八元學士承旨夔夔平章政事回回右承相脫脫太傅王保保即擴廓帖木兒學士馬馬

婦人雙名者隋煬帝宮婢羅羅元微之傳崔鶯鶯又范十郎女鶯鶯張建封妾盼盼開元中宮伎薛瓊瓊宋宣仁太后小名洎洎朱端朝取妓馬瓊瓊杜牧之所狎妓張好好元微之所歡錢唐妓謝好好畫中美



人真真又沈將軍妾真真又元名趙真真同時馮蠻  
子妻趙真真錢唐妓蘇小小私藏千牛女達奚盈盈  
又王山所接仙女吳盈盈錦官城妓灼灼翟素死節  
婢青青常青姬紅紅朱虞部姬寵寵北里妓王蘇蘇  
鄭舉舉王蓮蓮張住住錢唐倡楊愛愛善和坊妓端  
端武氏妓賽賽張虞卿妓英英又楚州官妓王英英  
秦州妓香香范十郎女燕燕宋善畫婦人任才仲妾  
艷艷徽宗幸妓李斯斯義妓毛惜惜又張幼謙妻羅  
惜惜成都角妓丁憐憐又湖州妓丁憐憐魏鵬妻賈  
娉娉榴花女石醋醋劉諷遇鬼仙女翹翹又理宗宮

人翹翹元名妓荆堅堅李心心願山山馮六六辛弃

疾妾田田錢錢 有別號雙字者金趙學士元吳

真人俱閒閒馮山人存存近有裘謙謙

鳥雙名者青丘灌灌又鷓鷓同上崇吾蠻蠻藥山羅羅

又鸛鸛周周見禽經行苞氏喑喑宵苞氏嘖嘖見獨

獸雙名者招搖往往往姑逢徹徹空桑軫軫泰山洞洞

秦戲辣辣霍山肫肫枚臯文文又南中猩猩北荒蛩

蛩交廣萬萬音即佛佛也羊羊螳螂也

魚雙名者剛山蠻蠻洛水庸庸見山海經又楊州禺

禺見王會



婦人以五色名者前青青紅紅又紅綃紅線紅拂紅  
鑿紅娘紅兒輕紅飛紅絳仙絳樹絳飛絳真丹霞紫  
光紫緩碧玉綠珠素女素娥又仙女青童相如賦美  
人有青琴

四同名者真真三同名碧玉樂府小又太元中司馬

又喬知之妾玉兒潘妃又元樹又陳敬瑄

二同名者飛燕漢趙后唐寶曆朝雲河間王琛婢夜

來魏文帝姬及前鶯鶯好好英英瓊瓊惜惜翹翹憐

憐

漢名士稱涼州三明太尉段熲紀明度遼將軍皇甫

規威明大司農張奐然明也出一時以為奇矣晉南

渡而後瑯邪諸葛恢穎川荀閏陳伯蔡謨俱字道明

而皆有名號中興三明人為之語曰京都三明各有

名蔡氏儒雅諸葛清然則前後有兩三明而後則字

俱同前則同郡各奇也

湘東王有同姓名錄其書今不存聊舉其灼灼者在

同時如兩魯參一魯參殺人而致魯子之母投杼兩

毛遂一毛遂墮井而致平原君之痛哭異世則魯秋

胡因婦採桑調其妻投水死漢亦有魯秋胡求聘翟

公女翟公誤傳調妻事以為薄行而不許婚俱可嘆

高 卷之三十一 五 世經堂刻



也其次如國師公劉秀以名應圖讖為王莽所殺而取王莽者為光武亦劉秀莽遣太師安新公王匡攻更始定國上公王匡不勝為所執殺唐李尚書益與宗人尚書益者俱赴飲據上坐因咲曰今日兩副坐頭俱李益代宗用韓翊知制誥宰相以平盧幕府員外及江淮刺史請上書春城無處不飛花絕句云用此韓翊而員外得之事皆竒

其它同時者漢時兩韓信俱高帝時一封楚王一封韓王三召平一故秦東陵侯一為陳王上柱國一齊

相 恐東陵侯即陳王柱國為陳封者秦自兩王恢俱

武帝時一浩侯一大行謀誘匈奴者也兩王臧武帝朝其二年以郎中令自殺一六年為太常兩王商俱成帝外戚一為丞相樂昌侯一為大司馬成都侯兩王章俱哀帝時一河平三年以太僕為右將軍六年復為太常一四年以京兆尹直言死兩王崇俱平帝時一新甫侯故丞相嘉子一大司空扶平侯魏兩王烈一字彥方有隱德一字長體有道術晉兩王渾一為涼州刺史係戎之父一為司徒係濟之父兩王澄一即濟弟封侯一即戎從弟荊州都督兩孫秀一吳降將一趙王倫嬖臣俱拜驃騎將軍封公兩周撫一



為王敦將一為彭城內史誅梁兩王琳一散騎常侍  
一德州刺史唐兩李光進俱代宗朝一為光弼弟一  
為光顏兄俱蕃將賜姓為節度使封公兩李繼昭俱  
昭宗時一為孫德昭一為符道昭俱賜姓名降朱梁  
為使相宋兩王著俱太祖時一以文學典制一以書  
學待詔金兩訛可俱太將

稍先後者吳兩公子慶忌一王僚子一夫差末年將  
楚兩莊躑一莊王時大盜一莊王裔孫將軍平滇自  
王者漢兩王莽一右將軍一大司馬篡位者兩王鳳  
一大司馬大將軍一更始成國上公兩王譚一宜春

侯一平阿侯兩徐幹一都護班超司馬一丞相曹操  
掾晉兩劉毅一光祿大夫一衛將軍兩張禹一丞相  
一太傅俱封侯兩解系一見陶璜傳一自有傳兩王  
愷一武帝舅一安帝時丹陽尹元兩伯顏一太傅淮  
陽王一大丞相秦王兩蕭鈞一蕭鸞子梁武時中書  
郎一蕭瑀從子唐太宗時率更令

異代而相類者兩王肅曹魏中領軍為魏制禮元魏  
尚書令亦為魏制禮兩王殷朱梁以節度使叛誅後  
周太祖亦以節度使誅兩王彥章梁大將為晉擒吳  
統軍為楚擒兩王珪唐侍中宋左僕射門下侍郎皆



門下相也兩王溥一唐懿宗一周世宗俱宰相  
仙人有兩王喬其一即子晉也其一為栢人今天墮  
玉棺以葬者僧有兩智永一梁書僧一宋畫僧

光武時固始侯李通魏武時都亭侯李通衛大夫王  
孫賈齊大夫王孫賈魏徐邈字景山見重武帝為侍  
中晉徐邈字仙民見重武帝為中書舍人魏將軍張  
遼漢兖州刺史張遼字叔高漢中郎將江革梁御史  
中丞江革梁李膺為蜀使至郡武帝悅之問曰今李  
膺何如昔李膺對云云晉文公有咎犯平公有咎犯  
善隱任政李密以祖母老辭官後魏李密以母老習

醫又隋末蒲山公李密則天時王方慶為相又王方  
慶領尚藥奉御高宗初張昌宗為脩文館學士則天  
末張昌宗為春官侍郎

漢宗室多同名者其自列侯以下或應有之乃至諸  
王亦自相犯何也豈非以宗正之失職耶余不能盡  
志姑志其顯者四劉慶六安王河間孝王更始燕王  
清河孝王四劉章城陽景王高密頃王齊哀王常山  
靖王三劉嘉梁荒王瑯琊康王漢中王三劉雲城陽  
哀王廣德夷王東平煬王三劉定沛釐王彭城頃王  
甘陵貞王兩劉長淮南厲王濟陰悼王兩劉榮臨江



閔王沛幽王兩劉遂趙叛王梁夷王兩劉交楚元王  
濟北懷王兩劉壽濟北惠王瑯琊恭王兩劉勃濟北  
貞王常山王兩劉勝中山靖山平原懷王兩劉武梁  
孝王城陽惠王兩劉玄淮陽文王淮陽王始即更兩劉  
旦燕刺王長沙煬王兩劉賀泗水戴王昌邑王兩劉  
授河間頃王膠東共王兩劉寵陳愍王樂安夷王夫  
以王賀廢主然泗水先封名之同猶可也淮南竄死  
趙遂燕旦以及絕國何所取而同之此大不可解者  
也

有以人而名器物者阮咸製阮遂名為阮咸今名阮

王右軍好鷺遂名鷺為右軍

見釋常談

康伯傳外國豉遂

名康伯

見博物志

僧鑿虛製湯羊遂名湯羊為鑿虛

今無之

番人畢羅好食湯麪遂名湯麪為畢羅

今傍加食

今人於

豕肉豆腐及它巾服之類皆加以東坡名謂為眉山

所製也有以器物而名人者令狐僕射楚小婢善歌

李商隱錦瑟詩名錦瑟韋中令臯佺善吹簫名玉簫

韋事見傳奇

兄弟稱二龍者漢許虔許劭齊柳悅柳惔五龍即竇

儀兄弟六龍者晉卞粹及溫羨八龍者漢荀儉緄靖

燾注爽肅專唐崔瑄珙璿璵玠球珣



兄弟三虎者賈彪

兄弟三鳳者河東薛氏

昔人有父字其子者曹丞相操每下教稱子桓右軍  
與人書謂子敬飛白大有勢子字其父者胡母謙之  
見父輔之暑月搖扇視事呼之曰彥國胡為自貽伊  
感從子字其叔父者袁種謂盎曰南方卑濕絲能日  
飲亡何說王母反而已有臣字其君者光武幸章陵  
宗室諸母酣悅相謂曰文叔少時謹信與人不款曲  
惟直柔耳今乃能如此

唐文皇為天策上將開天策府置十八學士房杜等  
多至宰相後薛收卒以劉孝孫補之楚王馬希範亦  
為天策上將開府幕僚拓跋恒李弘臯廖匡圖徐仲  
雅等十八人亦授學士

舜重瞳項羽重瞳隋魚俱羅朱梁康王友敬永樂中  
楚王子亦俱重瞳文王四乳宋范鎡百常父子明倪  
文僖謙俱四乳

泗州僧伽頂有一孔以絮室之發絮則異香出氛氳  
滿室佛圖澄左乳下一孔圍七寸亦以絮室之夜欲  
讀書發絮則光照一室時時水邊引腸胃滌之復納  
於內物理有不可致詰者重瞳四乳不足道矣



倉頡四目唐有三耳張秀才

柳子厚記李赤死廁鬼事以為其人慕李白故名赤已可咲矣霏雪錄所載慕太白者張碧字太碧慕樂天者黃居難字樂地又富家子杜四郎自號荀鴨以比杜荀鶴者尤可笑也

有舉孝廉而為人主者魏武吳大帝也狀元及第而為人主者夏主李遵項也

事有極可笑異者楚懷王死於楚為人所憐項梁立其孫心亦號楚懷王以謚為爵也元世祖年號曰至元其後順帝慕之亦改年曰至元林邑王范揚邁死

太子咄立慕父之德亦名揚邁皆夷俗也

父子同名者二人隋處士羅靖父亦名靖及范陽邁魏大將安同父名屈子亦名屈然則韓退之所云期其杜度不足道也史記鄭武公掘突譙周以為突滑而孫厲公突索隱以為皆非也

王處之臨之納之准之輿之進之凡六世王胡之茂之裕之瓚之秀之凡五世王羲之獻之靖之悅之凡四世王晏之岷之陋之徐逵之湛之聿之凡三世胡母輔之謙之吳隱之瞻之顏悅之愷之兩世俱仍之字



漢有劉箕子朱孫卿許顏回晉有王彭祖梁有庾晏  
嬰庾黔婁祖孫登又孫權女孫魯班宋翟馬周皆掩  
古人姓名

其命名有可咲者秦將軍孔子胡熟侯劉聖人更始  
劉聖公于闐國王李聖天辛太公若乳母王聖則女  
子也

取字有異者史記註仲雍字熟哉又北齊將軍劉乾  
字天

雙名而一字者任不齊字選顏之僕字叔之類也名  
與字同者張巡字巡之類也

師曠識駁識諫珂狐身識首陽之神狸身其二諫其

一諛東方朔識騶牙識巫雀識藻廉水木之精識恠

哉其一諛其二諫

管子知俞兒卑耳東方朔又知畢方獨足張寬知女

人星劉向知貳負上郡山中賈逵知鸞鷲胡綜知秦

始皇厭王氣物諸葛恪知僂囊山精如陸敬叔知彭

侯狀如黑竇攸知鼪鼠張華知龍鮓以苦酒沃知海

鳧毛知干將知臨平石鼓以蜀中桐材刻為知銅澡

盤晨夕鳴與洛知九館龍洞知然石以水灌知玉漿

龍穴石髓束皙知顯節陵科斗策賈淵知苟晞兒冢



王粲知服礬人豕裴子野知白題國何承天知亡新

威斗陸杳知紫荷橐又知千里酒又知古犧樽許敬

宗知帝丘李珽知內黃傅弘業知蝱形如豕仰鼻長尾有岐蘇

綽知西漢故倉地杜鎬知秦哀公墓李章武知鐵斧

為禁物沈約知東夷罨蓋瓦具高九尺銳下平蓋中有劍一蓋壘器也陸

澄識服匿單于賜蘇武酒器傅奕知金剛石孟詵知藥金段

成式知報時鐵董養知周會狄地下有蒼白鷲飛去盧若虛

識鼯鼠狗首虎臆大如拳杜鎬知雀餽僧贊寧知畫牛隱見

見首劉敞知龍雀刀赫連勃勃鑄又知周惡夫印為亞夫

印劉蛻知古銅盜非齊桓公物斛斯徵知罇于以芒銅振

之清響祖瑩知于闐國王故玉印徐鉉知海馬骨高裕

知陵鯉

陸澄與王儉等徵事候商略畢談所遺漏百千條皆

儉所未覩又與何憲等徵事悉并其舊物奪之何憲

在王儉宅徵事以最優得五色篔白羽扇王搗後至

悉奪之沈約與梁武徵栗事少其二沈約策劉顯十

事顯對其九劉顯策約五事約對其二梁武策錦被

事已盡劉孝標最後出十餘條南唐鉉錯策猫楚金

多五十事元陳呂數驢剛中少三十條

古今事有絕相類者今記之以供撫掌之資如瘦沈



語前有約後有昭略寄怨詩妻之竇前有玄後有滔  
望車塵之潘前有黨後有岳善畫婦人為帝殺之毛  
前有延壽後有惠遠致冰鮮之王前有祥後有延弔  
客驢鳴之王前有粲後有濟又銅錢作埒之王前有  
濟後有元寶立銅柱之馬前有援後有搃射石之李  
前有廣後有遠種玉得妻之陽前有洛陽雍伯後有  
盧龍翁伯怖小兒之麻胡前有秋後有祐又有劉胡  
及鬼俱曰麻胡凡四見

聖主時投水人知有卞隨務光而不知有北宮無擇  
騎青牛人知有老子而不知有封達生空桑人知有

伊尹而不知有孔子

見春秋  
孔演圖

白魚入舟人知有周武

王而不知有宋明帝河澌冰合人知有漢光武之滹  
沱而不知有慕容德之黎陽鳳雛號人知有龐統而  
不知有顧邵獻昨加毒以讒賜死人知有晉獻公子  
申生而不知有秦孝文王子西蜀侯憚思妾令方士  
致魂人知漢武之於李夫人而不知宋武之於殷淑  
儀治阿譽聞而阿不治人知有齊宣王之大夫而不  
知景公之晏子夢寐求相人知高宗之傳說而不知  
文王之臧丈人題壁作龍蛇歌人知有晉文之介子  
推而不知晉文之舟之僑秦許楚地而背之人知張



儀之於楚懷王而不知馮章之於楚王先食不死之藥而巧言以免死人知方朔之於漢武帝而不知中射之士之於楚王一字直百金人知淮南子而不知公孫子承相弘着妻棄夫人知朱買臣而不知太公望沈江負父屍人知有孝女曹娥而不知趙社女絡掘地得石擲人知有滕公而不知有衛靈飛廉看竹不問主人知有王徽之而不知有袁粲倚柱讀書雷震不輟人知有夏侯玄而不知有諸葛誕獲偷侍兒人試文不殺因以賜之人知有楊素之於李伯藥而不知有蔡興宗之於孫敬玉侍婢環執飲饌人知有王武子而不知有楊國忠孫晟國忠晟又俱號肉臺盤羊羨不徧致敗人知華元之於御斟而不知中山王之於司馬子期乳生湮人知有元德秀而不知有李善綵衣娛戲人知有老萊而不知有伯瑜知囊人知有晁錯而不知有樗里子魯匡讀易至損益而歎人知有向平而不知有孔子佩六印人知有蘇秦而不知有樂大以石為虎射之沒羽人知有李廣李遠而不知有熊渠子又王文論衡云是養由基充以由基射晉侯中目而不能殺之為辨極可笑射楚王中目者呂錡由基以一矢射錡伏弢而死也逐兔墮馬折肋



而殂人知齊主高演而不知燕主慕容皝倒用印人  
知有段秀實之阻朱泚而不知有李崧之安蜀一日  
殺二義士人知有袁紹之於臧洪陳容而不知有張  
敬兒之於邊榮程邕之能使人主前席人知有賈誼  
而不知有商鞅蘇綽飲千日酒至期發塚而醒人知  
有劉玄石而不知有趙英御屏隔座人知有漢鄭弘  
第五倫而不知有吳紀亮紀隲杯中蛇影人知有樂  
廣而不知有南皮令應柳樂弓應弩殺孝婦大旱三年人  
知有前漢之東海而不知有後漢之上虞萬石君人  
知有石奮而不知有秦襲張文瓘留犢事人知有時

苗而不知有羊扁食脫粟人知有公孫弘而不知有  
晏嬰錢神論人知有魯褒而不知有胡毋民成公綏  
記半面人知有楊愔而不知有應鳳陳蕃下榻人知  
有徐穉而不知有周球雪中高卧人知有袁安而不  
知有胡定夢贈筆人知有江淹而不知有王彪之王  
珣紀少瑜陸倕李白和凝馬裔孫其事稍異喫酒救火人

知有樂巴而不知有樊英邵信臣郭憲佛圖澄成武  
丁入水戮蛟人知有周處而不知有澹臺子羽荆欵  
飛菑丘訢羊車游後宮鹽水灑地人知有晉武而不  
知有宋文御膳中有髮自數三罪以免死人知晉平



公之庖人而不知光武之陳正因病嘗糞人知越王  
 句踐之於吳王夫差而不知郭弘霸之於魏元忠以  
 酒賜妬婦飲之無恙人知太宗之於房玄齡而不知  
 莊宗之於任圜即席盡器飲酒歸而尚醒稱所得器  
 人知裴弘泰之於裴鈞而不知潘炕之於朱梁太祖  
 下第獻燕詩座主以明年登第人知有章孝標而不  
 知有于化成刻石高山深谷人知有杜預而不知有  
 顏真卿賜行酒炙人知有顧榮而不知有何遜陰鏐  
 一箭落雙鷗人知有斛律光而不知有拓拔幹高駢  
 錦鏡事人知有隋煬而不知有甘寧然脂膏為燭人

知有董卓而不知有滿奮還帶陰德至相位人知有  
 裴中令而不知有白中令少孤門生廢蓼莪人知有  
 王裒而不知有顧歡發塚類遠祖貌人知有蕭穎士  
 之於鄱陽王而不知有吳綱之於長沙王入山妻二  
 仙女久而歸人知有天台之劉晨阮肇而不知剡縣  
 之袁栢狼碩因食辨勞薪人知有荀勗而不知有師  
 曠強索妾人知有孫秀武承嗣而不知有阮佃夫聞  
 鼓角聲加敬人知有范雲之於梁武而不知有到仲  
 舉之於陳武告靈不仕人知有王羲之而不知有何  
 偃通它心觀人知有忠國師之於大耳三藏而不知



有普寂之於柳中庸祭賽忘書乃在廟鯉魚為送人  
知有馬當山之王昌齡而不知有宮亭湖之估客奕  
棋覆局人知有王粲而不知有到漑製千字文人知  
有周興嗣而不知有蕭子範贈柳妾人知有韓翃而  
不知有李還古即位御床陷地人知有桓玄而不知  
有侯景誤食澡豆人知有王敦而不知有陸暢殞逆  
旅書生人知有王忱而不知有鮑子都廖有方橋神  
貌醜以足潛畫之人知有定州之張平子而不知有  
忖留神之魯般駱駝負水養魚軍中人知有宋孫仁  
祐而不知有隋虞孝仁殺負心僕人知有張詠而不

知有柳開金蓮歸院人知有蘇軾而不知有王珪  
雋不疑劉德大將軍光先後欲以女妻之俱辭不敢  
當俱病免後不疑以青州刺史為京兆尹德以青州  
刺史行京兆尹事皆多所平反

張崇還鎮率埒鬚錢趙在禮還鎮亦率拔釘錢  
庾杲之貧人云誰謂庾郎貧食鮭常有二十七種李  
崇富而吝人云李令公食常十八種蓋庾惟三韭崇  
二韭也南北一時事相類若此

漢蔡琰有胡笳十八拍王昭君有胡笳三十六拍至  
二十一拍



晉秦中寶滔妻蘇氏作迴文詩八百一十二字唐范陽盧母王氏作天寶迴文詩文亦八百十二字

晉平公出言而不當師曠舉琴而撞之跌衽宮璧魏文侯出言而不當師經舉琴而撞之中旒潰之一見淮南子一見劉向說苑燕太后不肯以少子質齊因陳翠愛少子之說而許趙太后不肯以少子質秦因左師觸龍愛少子之說而許一見趙世家一見戰國策高齊神武不貴慕容紹宗以留文襄唐文皇暫出李勣以留高宗俱見本紀申鳴援桴而進戰為賊殺其父功成而自殺趙苞援桴而進戰為賊殺其母功

成而毆血死一見說苑一見後漢書醫緩脈晉平公而曰君之病在膏之下育之上秦武王示扁鵲病而曰君之病在耳之前目之上謂皆以色致也一見左傳一見戰國策東方朔知赤物為恠哉飲酒十石李章武知鐵斧為厭物飲血三斗一見搜神記一見酉陽雜俎懷素習書盡數畝芭蕉鄭虔習書盡數屋柿葉俱見法書錄孫臏臏於魏而為齊師司馬喜臏於宋而為中山相一見本傳一見呂氏春秋王濟以錢千萬與王愷賭射八百里牛一勝而探牛心尔朱文略以好婢與高歸彥賭射千里馬一勝而截馬頭一



見晉書一見北齊書鄂千秋明蕭何功高立封侯公  
孫戎明樊噲不反立封二千戶一見蕭何傳一見王  
莽傳兖州刺史李恂郡園小麥胡蒜悉付從事揚州  
刺史費遂郡園小麥胡蒜悉付從事一見東觀漢記  
一見謝承後漢書孫權得諸葛恪而以老菜熟龜精  
張華得雷煥而以老菜辨狐精一見搜神記一見集  
異志漢郭林宗遇雨中角折人遂為折角巾周獨孤  
信馳馬帽微側人遂為側帽一見後漢書一見北史  
嚴峻為吳大帝誦孝經仲尼居張輔吳昭以為鄙生  
請誦君子之事上章陸澄為齊武帝誦孝經仲尼居  
王衛軍儉以為博而寡要請誦君子之事上章一見  
吳志一見南齊書吳大帝夢人以筆點額熊循賀以  
為當作主齊文宣夢人以筆點額王曇首賀以為當  
作主俱遂即位一見吳祚國統志一見齊書魏文帝  
為王時夢日墮地分為三分已得一分納懷中陳文  
帝微時夢亦然後俱為三分之主一見談藪一見陳  
本紀張茂先白鸚鵡夢為鷲鳥搏楊太真白鸚鵡亦  
夢為鷲鳥搏一見異苑一見明皇雜錄歐陽率更見  
索靖碑初看云浪虛得名次日看曰名下定無虛士  
坐卧其下十日不能去闔立本見張僧繇畫亦然見



宣和書畫譜楊司空素出見客挾侍姬紅拂因奔李靖郭太尉子儀出見客亦挾侍姬紅綃因奔崔氏一見虬髯客傳一見崑崙奴傳二人又皆劍俠也

郭汾陽與馮道亦有相類者郭以尚父太尉中書令汾陽王馮以太師中書令瀛王終俱八十餘又有女俱配龍王皆許之而死塑骨於廟亦大奇人有題馮女廟者身既事十主女亦配九龍可供一咲

劉賓客禹錫以集賢學士至京李司空紳罷鎮歸禹錫過之出名姬佐酒禹錫賦詩所謂司空見慣渾閒事惱斷蘇州刺史腸者李即以姬贈之劉後分司還

洛有姬甚美李司空逢言以計邀而奪之劉作四詩以擬四愁投李李但含咲而已竟不答末句有料得夜來天上鏡只應偏照兩人心語不知所奪之姬卽所贈者否但以一禹錫而兩李司空者一贈姬一奪之可作咲柄及杜牧之以御史分司過留守宴問美姬紫雲而欲得之朗吟而起其人亦李司空也名聽

弇州山人四部稿卷之一百六十二







